

# LATOUR VEYER

PE ANONS RWAYONM ZEOVA



ESKI OU TI A KONTAN  
ETIDYE LABIB?

SA MAGAZIN, *Latour Veyer*, i onor Zeova Bondye konman Dirizan dan liniver. I rekonfort dimoun avek sa bon nouvel lo Rwayonm Bondye ki pou byento met en lafen avek tou mesanste e fer later vin en paradi. I promot lafwa dan Zezi Kri, ki ti mor pour ki nou kapab ganny lavi eternel e ki pe dirize konman Lerwa dan Rwayonm Bondye. Sa magazin in ganny pibliye kontinyelman depi 1879 e i pa angaz dan okenn politik. I respekte Labib konman son lotorite.

Eski ou ti a kontan resevwar plis lenformasyon oubyen en letid Labib gratwit?

Vizit [www.jw.org/crs](http://www.jw.org/crs) oubyen anvoy ou demann lo enn sa bann ladres.

Pour MORIS:  
Jehovah's Witnesses  
Rue Baissac  
Petit Verger, Pointe aux Sables

Pour GRANNBRETANNY:  
Jehovah's Witnesses  
The Ridgeway  
London NW7 1RN

Ladres bann diferan pei i lo [www.jw.org/contact](http://www.jw.org/contact).

Nou pa vann sa magazin me i ganny servi dan sa travay mondyal pour ansenny dimoun lo Labib e i ganny soutenir par kontribisyon volonter. Eksepte kan i endike, bann sitasyon Lekritir Ebre in ganny tradwir apartir *New World Translation of the Holy Scriptures* an Angle e bann referans dan Lekritir Grek in ganny tire dan *Nouvo Testaman* an Kreol Seselwa. Kan NW i swiv en sitasyon, i endike ki sa verse in ganny tradwir apartir *New World Translation of the Holy Scriptures* an Angle.

*The Watchtower* (ISSN 0043-1087) is published semimonthly by Watchtower Bible and Tract Society of New York, Inc.; L. Weaver, Jr., President; G. F. Simonis, Secretary-Treasurer; 25 Columbia Heights, Brooklyn, NY 11201-2483, U.S.A., and in England by Watch Tower Bible and Tract Society of Britain, The Ridgeway, London NW7 1RN (Registered in England as a Charity).

© 2015 Watch Tower Bible and Tract Society of Pennsylvania. Printed in Britain.

LO KOUVERTIR

Eski ou ti a kontan  
etidye Labib? PAZ 3-7

Akfer etidye Labib? 3

En program letid Labib pour tou dimoun 4

OSI DAN SA NIMERO

Labib i sanz lavi

Trwa kestyon ki ti sanz mon lavi 8

En konversasyon avek en vwazen

Akoz nou devret komemor lanmor Zezi? 10



Biografi

Lizye Jairo—Son fason pour servi Bondye 13

Labib i reponn 16



LIR PLIS LO ENTERNET



OTHER BIBLE QUESTIONS  
ANSWERED

Eski Labib i  
en rikord bann  
panse Bondye?

(Get anba *BIBLE TEACHINGS >  
BIBLE QUESTIONS ANSWERED*)

DOWNLOAD SA  
MAGAZIN DAN  
DIFERAN FORMAT

# Akfer etidye Labib?

Ki bi nou lavi?

Akoz dimoun i soufer e mor?

Ki lavenir i rezerve pour nou?

Eski Bondye i entereze avek mwan?

Eski ou'n deza demann ou lekor bann kestyon koumsa? Si i leka, ou pa tousel. Dimoun partou dan lemonn pe reflexir lo sa bann kestyon pli enportan dan lavi. Eski ou kapab trouv larepons?

Plizyer milyon dimoun ti pou dir, "Wi!" Akoz? Parski zot i'n trouv bann larepons satisfezan dan Labib pour zot bann kestyon. Eski ou ti pou kontan konn sa ki Labib i dir? Si wi, petet ou ti a kontan benefisyè a travè en letid Labib gratwit ki ganny ofer par Temwen Zeova.\*

I vre, konsènan etidye Labib, serten dimoun i dir "Mon tro okipe." "I tro difisil." "Mon pa pou sanz mon larelizyon." Me lezot dimoun i annan en lot pwennvi. Zot sezi sa loportinite pour aprann sa ki Labib i dir. Annou vwar serten legzanp:

"Mon ti al legliz Katolik ek Protestan, tanp Sik ek monaster Boudis e mon ti etidye teoloji dan liversite. Pourtan, en kantite mon bann kestyon lo Bondye pa ti ganny reponn. Apre sa, en Temwen Zeova ti pas kot mwan. Mon ti vreman enpresyonnen par son bann larepons ki ti baze lo Labib, alor mon ti dakor pour etidye Labib."—Gill, Langleter.

"Mon ti annan bokou kestyon konsènan lavi, me mon pa ti satisfè avek bann larepons ki paster mon legliz ti donnen. Par kont, en Temwen Zeova ti



reponn tou mon bann kestyon zis an servan Labib. Kan i ti demann mwan si mon ti a kontan aprann plis, mon ti akseptè avek plezir."—Koffi, Benen.

"Mon ti kirye konsènan kondisyon bann mor. Mon ti krwar ki bann mor ti kapab fer ditòr bann ki vivan, me mon ti anvi konnen sa ki Labib i dir konsènan sa. Alor mon ti konmans etidye Labib avek en zanmi Temwen Zeova."—José, Brezil.

"Mon ti esey lir Labib me mon pa ti kapab konpran li. Apre, Temwen Zeova ti pas kot mwan e zot ti eksplik klerman plizyer profesyonèl dan Labib. Mon ti anvi gete kwa ankor ki mon ti kapab aprann."—Dennize, Meksiko.

"Mon ti demann mon lekor si Bondye ti vreman entereze avek mwan. Alor mon ti deside pour priy avek sa Bondye ki Labib i koz lo la. Son landmen Temwen Zeova ti pas kot mwan e mon ti akseptè en letid Labib."—Anju, Nepal.

Sa bann leksperyans i fer nou rapel bann parol Zezi: "Ere bann ki konsyan zot bezwen spirityel." (Matye 5:3, NW) Wi, i dan natir tou imen pour annan en bezwen spirityel. Zis Bondye ki kapab satisfè sa bezwen e i fer sa a travè son Parol Labib.

Alor, kwa ki enplike dan en letid Labib? Ki mannyer i kapab benefisyè ou? Sa bann kestyon pou ganny reponn dan lartik swivan.

\* Dapre Labib, Zeova i non Bondye.



## BANN FE LO LABIB

**NON:** Sorti dan sa mo Grek *bi·bli'a* ki vedir “bann pti liv”

**KONTENI:** 39 liv an Ebre (avek serten parti an Arameen) e 27 liv an Grek

**EKRI:** Par apepre 40 ekriven dan en lesplas 1,600 an, depi 1513 A.N.L. ziska apepre 98 N.L.\*

**LANGAZ:** In ganny tradwir an antye oubyen an parti dan plis ki 2,500 langaz

**DISTRIBISYON:** Apepre senk bilyon Labib. I sa liv ki'n ganny distribye plis dan lemond antye.

\* Sa abrevyasyon A.N.L. i vedir “Avan Nou Lepok” e N.L. i vedir “Nou Lepok.”



## EN PROGRAMM LETID LABIB POUR TOU DIMOUN

Temwen Zeova i ganny rekonnèt pour zot travay predikasyon. Me eski ou ti konnen ki nou osi fer en program letid Labib dan lemond antye?

An 2014, plis ki 8,000,000 Temwen Zeova dan 240 pei in kondwir preski 9,500,000 letid Labib sak mwan.\* Anfet, sa kantite dimoun ki pe etidye Labib avek nou i depas popilasyon apepre 140 pei!

Pour reisi fer sa travay edikasyonnel, Temwen Zeova i pibliy preski en *bilyon* edmi Labib, liv, magazin ek lezot publikasyon letid sak lannen dan apepre 700 diferan langaz! Sa travay eksepsyonnel ki ganny fer pour pibliy tousala i permet dimoun etidye Labib dan zot langaz prefere.

\* Bann letid Labib an zeneral i ganny fer avek en dimoun tousel ou byen avek en pti group dimoun.





LAREPONS BANN KESTYON KI SOUVAN GANNY DEMANDE  
KONSERNAN NOU PROGRAMM LETID LABIB

## Ki mannyer sa letid i deroule?

Nou swazir diferan topik baze lo Labib e egzamin bann verse Labib ki relye avek sa bann size. Par egzanz, Labib i reponn bann kestyon tel parey: Ki sennla Bondye? Ki mannyer Bondye i ete? Eski i annan en non? Kote i reste? Eski nou kapab vin pros avek li? Sa ki pa fasil se pour konnen kote pour trouv sa bann larepons dan Labib.

Pour ed dimoun trouv sa bann larepons, normalman nou abitye servi sa liv 224 paz ki annan pour tit *Ki Labib i vreman dir?*\* Sa liv in ganny fer espesyalman pour ed dimoun konpran bann lansennyman de baz lo Labib. I enkli bann leson lo Bondye, Zezi Kri, soufrans bann imen, rezireksyon, lapriyer e bokou plis size ankor.

\* Pibliye par Temwen Zeova. Plis ki 230 milyon kopi sa liv in ganny enprimen dan plis ki 260 langaz.

.....  
 “Kan mon ti pe lekol mon pa ti zanmen kontan etidye me sa kalite letid ti gou. An plis, bann keksoz ki mon ti aprann ti vreman rekonfortan!”  
 —Katlego, Sid Afrik.



.....  
 “Sa letid ti reponn tou mon bann kestyon e menm bokou plis ankor.”—Bertha, Meksiko.

.....  
“Sa letid Labib ti ganny fer kot mwan dan en ler ki ti apropiye pour mwan. Ki pli bon ki sa!”—Eziquiel, Brezil.



.....  
“Parfwa mon ti etidye 15 a 30 minit, par ler i ti kapab ale pour plis letan. I ti depan lo sa ki ti pli konvenab pour mwan.”  
—Viniana, Lostrali.



.....  
“Sa letid ti gratwit. I ti enkrwayab!”  
—Aimé, Benen.



.....  
“Mon ansenyan ti vreman zantiy e annan bokou pasyans. Nou ti devlop en lanmitye pros.”—Karen, Nor Irlann.



.....  
“Bokou dimoun i etidye Labib san vin en Temwen Zeova.”—Denton, Langleter.



## Kan e kote sa letid i kapab ganny fer?

Sa letid i kapab ganny fer en letan ek landrwa ki konvenab pour ou.

## Pour konbyen letan en sesyon letid i dire?

Bokou dimoun i met dekote apepre enn erdtan sak semenn pour etidye Labib. Me sa letan i kapab varye. Nou pou adapte li dapre ou programm personel. I annan dimoun ki etidye pour zis 10 a 15 minit sak semenn.

## Konbyen sa letid Labib i koute?

Sa letid ek piblikasyon i gratwit. Sa i annakor avek lenstriksyon ki Zezi ti donn son bann disip, i ti dir: “Zot in resevwar pour nanryen alor donn osi pour nanryen.”—Matye 10:8.

## Pour konbyen letan mon pou bezwen etidye?

Ou kapab kontiny fer sa letid otan ki ou oule. Sa liv *Ki Labib i vreman dir?* i kontyen 19 leson. Ou kapab etidye nenport oubyen tou bann leson avek en vites ki ou santi i apropiye pour ou.

## Eski mon oblize vin en Temwen Zeova?

Non. Nou rekonnèt avek respe ki sak dimoun i annan drwa pour swazir kwa ki i pou krwar. Selman, dimoun ki aprann bann lansennyman de baz konsernan Labib i kapab fer en swa baze lo en bon konnesans.



## Kote mon kapab ganny plis lenformasyon?

Lo sit Enternet [jw.org](http://jw.org) ou pou kapab trouv lenformasyon egzakt konsernan bann krwayans ek travay Temwen Zeova.

## Ki mannyer mon kapab demann en letid Labib?

- Ranpli sa form lo [www.jw.org](http://www.jw.org).
- Ekrir sa ladres ki pli pros avek ou ki lo paz de sa magazin.
- Kontakte Temwen Zeova dan ou zanmirant. Ou kapab get anba *Churches > Association of Jehovah's Witnesses* dan liv telefonn. ■



## LED POUR BANN FANMIR

“Kan mon madanm ti konmans etidye Labib, mon ti remark bann gran sanzman dan li. Nou lavi familyal ti amelyore. Mon ti kirye pour konnen kwa ki i ti pe aprann alor mwan osi mon ti konmans etidye. Sa ki mon ti aprann ti fer mwan vin en pli bon dimoun. Etidye Labib ti fer nou fanmir vin pros avek kanmarad.”—**Eziquier**.

“Aprè ki mon ti konmans etidye Labib, mon ti aret pran drog, mon ti aret abiz lalkol e mon ti aprann kontrol mon lakoler. Mon lakour i pli prop e pli annord. Mon apresye mon fanmir bokou plis ankor e mon kontan fer bann keksoz ki pou fer zot plezir. Mon santi mwan bokou pli ere.”—**Karen**.

“Serten ti kritik mwan akòz mon etidye Labib. Me mon msye ti sipòrt mwan dan mon desizyon par dir: ‘Mon pa fatig mwan avek sa ki dimoun i dir. Sa ki enportan pour mwan se sa bann bon sanzman ki ou’n fer. Kontinyen sa ki ou pe fer.’ Nou lavi fanmir pa’n zanmen pli meyer ki sa!”—**Viniana**.



RAKONTE PAR **DORIS ELDRED**

NE  
**1949**  
 PEI NATAL  
**LETA-Z-INI**  
 LEPASE  
**ROD VRE  
 BI DAN LAVI**



## Trwa kestyon ki ti sanz mon lavi

**MON LAVI DAN LEPASE:** Mon ti grandi Ancram, en pti lavil lwen avek sant New York, Lanmerik. Bann dimoun ki ti viv laba ti souvan bann ki ti annan laferm bef. Anfet, ti annan plis bef ki dimoun.

Mon fanmir ti asiste sa sel legliz ki ti annan. Tou le dimans bomaten, mon granpapa ti fer mon soulye klate e apre sa mon ti al *Sunday school* avek en pti Labib blan ki mon granmanman ti'n donn mwan. Mwan ek mon bann frer ek ser nou ti aprann travay dir, respekte e ed nou bann vwazen e osi apresye bann benediksyon ki nou ti pe gannyen.

Ler mon ti ariv laz adilt, mon ti kit sa landrwa e vin en anseyan lekol. Mon ti annan en kantite kestyon konsernan Bondye e konsernan lavi. Serten mon bann zelev ti annan bann bon abilite. Lezot ti napa sitan abilite me zot ti travay dir. Serten ti annan bann dezabilite fizik, me lezot ti vreman byen fizikman. Mon ti santi ki sityasyon sa bann zanfan ti enzis. Parfwa paran sa bann zanfan ki ti napa bokou abilite ti kontan dir, "Koumsa ki Bondye i anvi mon piti i ete." Mon ti demann mon lekor ki mannyer Bondye i kapab permet bann pti baba ne avek bann dezabilite. Apre tou, sa pti baba pa'n fer nanryen mal.

Mon ti osi demann mon lekor, 'Ki sa keksoz ki mon devret fer pour ki mon lavi i annan en vre bi?' Mon ti santi mon lavi ti pe pas sitan vit. Mon ti grandi dan en bon fanmir, mon ti etidye dan bann bon lekol e la mon ti pe fer en travay ki mon kontan. Me larestan mon lavi ti paret vid. I vre, mon ti kapab marye, ganny en bon lakaz, annan zanfan, kontinyen travay ziska ki mon pran retret e avek letan al reste dan lakaz bann dimoun aze. Mon ti demann mon lekor si zis sa bi lavi.

**KI MANNYER LABIB IN SANZ MON LAVI:** En fwa pandan lete, mon ti fer letour Lerop avek serten mon bann koleg travay. Nou ti al vizit Westminster Abbey, Notre-Dame de Paris, Vatican ek plizyer bann pti legliz ankor. Partou kot mon ti ale mon ti demann kestyon. Apre ki mon ti'n retourn kot mwan Sloatsburg, New York, mon ti vizit plizyer legliz. Me personn pa ti kapab donn mwan bann larepons satisfezan.



En zour, enn mon etidyan ki ti annan 12 an ti apros mwan e demann *mwan* trwa kestyon. Premyerman, i ti demann mwan si mon okouran ki i en Temwen Zeova. Mon ti dir li wi. Dezyenmman, i ti demann mwan si mon ti a kontan konn plis konsernan Temwen Zeova. Mon ti dir wi. Trwazyenmman, i ti demann mwan kote mon reste. Ler mon ti dir li, nou ti realize ki nou ti reste pre avek kanmarad. Mon pa ti zanmen mazine ki sa trwa kestyon ki sa pti fiy ti demann mwan ti pou sanz mon lavi konpletman!

Pa lontan apre, i ti vin kot mwan lo son bisiklet e konmans en letid Labib avek mwan. Mon ti demann li sa bann kestyon ki mon ti'n demande avek plizyer sef relizye. Kontrerman avek zot, atraver mon prop Labib, i ti montre mwan bann larepons kler e satisfezan ki mon pa ti'n zanmen vwar oparavan!

Mon ti vreman kontan e satisfes avek sa ki mon ti pe aprann dan Labib. Mon ti ganny touse ler mon ti lir sa parol dan 1 Zan 5:19 ki dir: "Lemonn antye i dan pouvwar dyab." Mon ti soulaze pour aprann ki Bondye pa responsab pour tou sa bann soufrans ki arive dan lemonn me plito Satan ki responsab e Bondye pou rezourd sa bann problem. (Revelasyon 21:3, 4) Mon ti trouve ki Labib i fer sans ler i ganny eksplike dan en fason kler. Menm si sa Temwen Zeova ki ti pe etidye avek mwan ti annan zis 12 an, mon ti realize ki laverite i laverite e i pa fer okenn diferans lekel ki dir li.

Kantmenm sa, mon ti anvi vwar si Temwen Zeova ti viv dapre sa ki zot prese. Par egzanp, sa pti fiy ti fer resorti ki bann vre Kreyen i demontre pasyans ek labonte. (Galat 5:22, 23) Alor, mon ti deside pour teste li pour vwar si i demontre sa bann kalite. En zour, mon ti fer ekspres pour ariv an retar mon letid. Mon ti demann mon lekor: 'Eski i pou esper mwan? Si wi, eski i pou ankoler akoz mon an retar?' Kan mon ti pe antre kot mwan pour park mon loto, mon ti vwar li pe esper mwan lo peron. I ti tay kot mon loto e dir: "Mon ti pre pour al kot mwan e demann mon manman pour telefonn lopital ek lapolis pour gete si ou oke akoz zanmen ou'n deza an retar pour ou letid. Mon ti enkyet pour ou!"

En lot fwa, mon ti demann li en kestyon ki mon ti panse ti pou tro difisil pour en zanfan 12 an reponn. Mon ti anvi vwar si i ti pou zis envant en larepons. Kan mon ti demann li sa kestyon, i ti get mwan dan en fason vreman serye e i ti dir: "Sa i en kestyon byen difisil. Mon pou ekri li e demann mon paran." Vre, ler i ti retournen pour nou letid, i ti ammenn en *Latour Veyer* ki ti annan larepons mon kestyon ladan. Se sa ki ti atir mwan anver Temwen Zeova parski dan zot bann publikasyon ti annan larepons baze lo Labib pour tou mon bann kestyon. Mon ti kontinyen etidye avek sa pti fiy e en-n-an pli tar mon ti batize konman en Temwen Zeova.\*

**KI BYENFE MON'N GANNYEN:** Ler mon ti'n finalman ganny bann larepons satisfezan pour mon bann kestyon, mon ti anvi partaz zot avek tou dimoun. (Matye 12:35) O konmansman, mon fanmir ti opoz mon nouvo krwayans. Me avek letan, zot latitid ti sanze. Ver lafen son lavi, mon manman ti konmans etidye Labib. Menm si i'n mor avan ki i ti ganny sans batize, mon asire ki i ti'n deside pour servi Zeova.

An 1978, mon ti marye avek en Temwen Zeova ki ti apel Elias Kazan. An 1981, mwan ek Elias ti ganny envite pour form parti lafanmir Betel,<sup>#</sup> Leta-z-ini. Malerezman, apre ki nou ti'n servi dan Betel pour zis kat-r-an, Elias ti mor. Menm si mon ti en vev, mon ti kontinyen mon servis dan Betel e sa ti donn mwan en keksoz pour konsantre lo la e i ti soulaze mwan en kantite.

An 2006, mon ti marye avek en manm lafanmir Betel ki apel Richard Eldred. Mwan ek Richard nou pe kontinyen rezouir nou privez pour servi dan Betel. Lefet ki mon konn laverite lo Bondye, mon vreman santi ki mon pa'n zis trouv bann larepons ki mon ti pe rode me mon'n osi trouv en vre bi dan lavi. Tousala ti konmans avek trwa kestyon ki en pti fiy ti demann mwan. ■

\* An tou, sa pti fiy ek son bann frer ek ser ti ed senk zot bann ansenyant pour etidye Labib e konmans ador Zeova.

<sup>#</sup> "Betel" i vedir "Lakaz Bondye" e i sa lekspresyon ki Temwen Zeova i servi pour dekrir zot bann biro brans partou dan lemonn. (Zenez 28:17, 19, not anba paz) Bann manm lafanmir Betel i fer diferan travay ki siport sa travay edikasyonnel Temwen Zeova.

# Akoz nou devret komemor lanmor Zezi?

Sa konversasyon ki swiv i enn ki Temwen Zeova i kapab gannnen avek en vwazen. Meton en Temwen ki apel Megan in vin kot lakour en madanm ki apel Shirley.



## “FER SA AN MON MEMWAR”

**Megan:** Alo Shirley. Mon ti vremen kontan vwar ou vin asiste Memoryal lanmor Zezi Kri semenn pase.\* Ki mannyer ou’n vwar sa renyon?

**Shirley:** Mon ti byen kontan pour vini, me fransman mon pa ti konpran tou keksoz ki ti ganny dir. Mon konnen ki dimoun i fet nesans Zezi pandan Nwel ek son rezireksyon pandan Pak, me mon pa’n zanmen konn personn ki komemor son lanmor.

**Megan:** I vre ki Nwel ek Pak i bann lafet ki popiler partou dan lemond. Me Temwen Zeova i santi ki i enportan pour rapel lanmor Zezi. Si ou annan detrwà minit, mon ti pou kontan montre ou akoz ki nou fer sa.

**Shirley:** Oke.

**Megan:** Anfet, Temwen Zeova i komemor lanmor Zezi akoz i ti demann son bann disip pour fer li. Annou vwar kwa ki ti arive sa zour swar avan Zezi ti mor. Eski ou’n deza tann konsernan en repa spesyal ki i ti pran avek son bann disip fidel?

**Shirley:** Ou pe dir sa repa Lapak?

**Megan:** Sanmenm. I osi apel Repa Senyer. Pandan sa repa, Zezi ti donn son bann disip bann lenstriksyon byen kler. Silvouple, ou kapab lir son bann parol dan Lik 22:19?

\* Enn fwa par an, Temwen Zeova i zwenn ansanm pour komemor lanmor Zezi pour rapel son sakrifis. Sa lannen, sa levnenm i tonm Vandredi le 3 Avril.

**Shirley:** Oke. “Apre i ti pran dipen, e apre ki i ti’n remerci Bondye, i ti kas li an morso e i ti donn zot an dizan, ‘Sa i mon lekor ki’n ganny ofer pour zot. Fer sa an mon memwar.’”

**Megan:** Mersi. Remark byen sa lenstriksyon ki Zezi ti donner dan dernyen fraz sa verse: “Fer sa an mon memwar.” Zis avan ki i ti demann son bann disip pour rapel li, Zezi ti fer li kler konsernan *kwa* ki zot ti devret rapel lo li. I ti dir ki i ti pou donn son lavi pour son bann disip. Zezi ti dir sanmenm dan Matye 20:28. Sa verse i dir “Fisde-Lonm pa’n vin pour ganny servi, me pour servi e donn son lavi konman pri pour liberasyon bokou dimoun.” An bref, se pour sa rezon ki tou le-z-an Temwen Zeova i zwenn ansanm zour Memoryal lanmor Zezi, pour rapel sa sakrifis ranson Zezi. Atraver son lanmor, tou bann imen ki obeisan i kapab ganny sove.

## AKOZ NOU TI BEZWEN EN RANSON?

**Shirley:** Mon’n tann dimoun dir ki Zezi in mor pour ki nou kapab ganny sove. Me fransman, mon pa’n zanmen konpran ki mannyer sa ti possible.

**Megan:** Pa zis ou Shirley. Sa topik konsernan sakrifis ranson Zezi i vremen profon. Me an menm tan i enn parmi bann pli zoli lansennyman dan Parol Bondye. O kontrè, i oke pour nou kontinyen koze?

**Shirley:** Wi i oke li.

**Megan:** Bon. Mon fek pe lir lo ranson e mon pou esey eksplik li dan en fason senp.

**Shirley:** Oke.

**Megan:** Premyerman pour konpran sa ranson, nou bezwen byen konpran sityasyon ki Adan ek Ev ti met zot lekòr ladan, kan zot ti fer pese dan zarden Edenn. Pour ed nou konpran kwa ki sa sityasyon ti enplike, annou lir ansanm Romen 6:23. Eski ou ti a kontan lir sa verse?

**Shirley:** Oke. I dir: "Rekonpans pour pese i lanmor, me don gratwit ki Bondye i donner i lavi eternal dan Kris-Zezi nou Senyer."

**Megan:** Mersi. Annou egzamin sa ki nou'n lir. Premyerman, gete ki mannyer sa verse i konmans: "Rekonpans pour pese i lanmor." Sa i en senp lareg ki Bondye ti met an plas o konmansman listwar imen, sa rekonpans oubyen pinisyon pour pese i lanmor. Byensir, o konmansman personn pa ti fer okenn pese. Adan ek Ev ti ganny kree dan en fason parfe e tou zot zanfan ti pou'n ne parfe. Alor, ti pou napa okenn rezon pour dimoun mor. Adan ek Ev ek tou zot desandans ti annan sa posibilite pour viv eternalman dan lazwa. Me nou konnen ki keksoz pa ti deroul koumsa, pa i vre?

**Shirley:** Me wi, Adan ek Ev ti manz sa fri ki Bondye ti defann zot manze.

**Megan:** Egzakteman. Kan zot ti fer sa, Adan ek Ev ti swazir pour dezobei Bondye alor zot ti fer pese. Anfet, zot ti swazir pour vin enparfe, pour vin bann peser. Sa swa ti anmenn bann konsekans byen grav pa zis pour Adan ek Ev me osi pour zot desandans.

**Shirley:** Ki ou pe esey dir?

**Megan:** Ma donn ou en legzanp. Dir mwan, eski ou kontan fer gato?

**Shirley:** Wi! Mon kontan.

**Megan:** Dizon ki ou'n ganny en zoli moul nef. Me avan ki ou ganny sans pour servi li, i bat ater e ganny en defo. Alor, kwa ki pou arive avek okenn gato ki ganny fer dan sa moul? Pa zot osi zot pou annan sa menm defo ki sa moul?

**Shirley:** Me wi!

**Megan:** Dan menm fason, kan Adan ek Ev ti swazir pour dezobei Bondye, zot ti ganny sa defo oubyen "tas" atraver pese ek lenperfeksyon. Vi ki zot ti vin peser avan ki zot ti ganny sans pour fer zanfan, tou zot bann zanfan ti pou ne avek sa menm defo. Zot tou zot ti pou ne dan sa leta pese. Dan Labib, sa mo "pese" pa zis vèdir en aksyon me i enkli sa kondisyon ki nou'n erite. I vre ki nou pa'n fer okenn keksoz mal, akòz nou pa ti ankor ne ler sa ti arive. Selman kan Adan ek

## Sakrifis ranson i sa pli gran lekspresyon lanmour ki'n deza ganny demontre

Ev ti fer pese, zot ti kondann nou ek tou zot bann desandans ensi ki nou desandans pour viv en lavi enparfe dan pese ki ti pou fini avek lanmor. Zis parey nou lir dan Romen 6:23, konsekans pour pese i lanmor.

**Shirley:** Me sa pa zis. Akòz tou imen i bezwen soufer pour touzour zis akòz pese Adan ek Ev?

**Megan:** Ou annan rezon, i pa zis. Me i pa fini la. Dan son lazistis parfe, Bondye ti predir ki Adan ek Ev i devret mor pour zot bann pese, me i pa ti pou les nou konman zot bann desandans san okenn lespwar. Bondye ti fer en fason pour nou sorti dan sa sityasyon. Se la ki sakrifis ranson Zezi i annan son lenportans. Annou get ankor Romen 6:23. Apre ki i dir "rekonpans pour pese i lanmor," sa verse i dir: "Me don gratwit ki Bondye i donner i lavi eternal dan Kris-Zezi nou Senyer." Alor, se lanmor Zezi ki liber nou dan pese ek lanmor.\*

\* En lot lartik dan sa seri pou eksplike ki mannyer sakrifis ranson Zezi i liber nou dan pese e osi ki nou bezwen fer pour benefisyen atraver sa ranson.

## SA RANSON—PLI GRAN DON GRATWIT KI BONDYE I DONNEN

**Megan:** I annan en lot detay dan sa verse ki mon ti a kontan koz lo la.

**Shirley:** Kisisa?

**Megan:** Get byen sa ki sa verse i dir: “Don gratwit ki *Bondye* i donnen i lavi eternal dan Kris-Zezi nou Senyer.” Alor, si Zezi ti sa enn ki ti soufer e mor pour nou e donn son lavi pour nou, akoz ki sa verse i koz lo sa ranson konman “don gratwit ki Bondye i donnen”? Akoz i pa dir “don gratwit ki Zezi i donnen”?\*

**Shirley:** Mmm. Mon pa tro asire.

**Megan:** Anfet, Bondye ti kree Adan ek Ev e zot ti fer pese kont Bondye kan zot ti dezobei dan zarden Edenn. I ti bezwen vreman sagren ler son de premye zanfan imen ti rebel kont li. Me deswit Zeova ti trouv en solisyon.<sup>#</sup> I ti fer plan pour enn son bann kreatir spirityel vin lo later, viv konman en imen parfe e finalman donn son lavi konman en sakrifis ranson. Alor, sa ranson ti vreman en don sorti kot Bondye. I annan en lot fason osi ki sa ranson ti en don sorti kot Bondye. Eski ou’n deza mazine ki mannyer *Bondye* ti santi ler Zezi ti ganny met a mor?

**Shirley:** Non, mon pa’n deza mazin lo la.

**Megan:** Mon vwar detrwa pti zouzou la anba lavarang. I bezwen ki ou annan zanfan.

**Shirley:** Wi mon annan de, en pti garson ek en pti fiy.

\* Dapre Labib, Bondye ek Zezi i de diferan personnaz. Pour plis lenformasyon, vwar sapit 4 dan liv *Ki Labib i vreman dir?* pi-bliye par Temwen Zeova. I osi disponib lo [www.jw.org](http://www.jw.org).

<sup>#</sup> Vwar Zenez 3:15.

**Megan:** Konman en paran, zis mazine ki mannyer Zeova, Papa Zezi dan lesyel, ti bezwen santi zour ki Zezi ti mor. Andotmo, ki mannyer I ti santi ler I ti vwar son Garson presye lo later pe ganny arete, boufonnen e ganny koudpwen? Ki mannyer Papa ti santi anmezir son Garson ti ganny kloute lo en potò dibwa e ganny les koumsa pour soufer en lanmor kriyel?

**Shirley:** I ti bezwen vreman fermal pour li get sa. Mon pa’n deza mazin lo sa oparavan!

**Megan:** Byensir, i enposib pour nou dir egzakteman ki mannyer Bondye ti santi sa zour. Me sa ki nou konnen se ki I annan santiman e nou osi konnen akòz I ti les tousala arive. I’n ganny byen eksplike pour nou dan en verse ki bokou dimoun i konnen, sa i Zan 3:16. Ou kapab lir li silvouple?

**Shirley:** Wi. I dir: “Bondye in telman kontan lemonn ki i’n donn son sel Garson, pour ki nenport ki, ki krwar dan li, pa pou mor, me i a ganny lavi eternal.”

**Megan:** Mersi. Get ankor konmansman sa verse. I dir: ‘Bondye in kontan lemonn.’ Sanmenm sa keksoz prensipal, *lanmour*. Lanmour in pous Bondye pour anvoy son Garson lo later pour mor pour nou. An realite, sa sakrifis ranson i sa pli gran lekspresyon lanmour ki’n deza ganny demontre. Se pour sa rezon ki Temwen Zeova i zwenn ansanm sak lannen pour komemor Memoryal lanmor Zezi. Eski sa pti diskisyon in ed ou?

**Shirley:** Wi i’n byen ed mwan. Mersi pour pran ou letan pour pas lo tousala avek mwan. ■

---

Eski ou annan bann kestyon lo serten topik lo Labib? Eski i annan keksoz ki ou ti a kontan konnen lo krwayans oubyen aktivite bann Temwen Zeova? Si i le ka pa ezite pour demann en Temwen Zeova. I pou kontan pour donn ou plis lenformasyon.



# Lizye Jairo son fason pour servi Bondye

RAKONTE PAR SON FRER  
SAMUEL RUIZ-LEÓN ARROYO



Eski ou kapab mazinen ki ou napa kontrol lo ou lekor eksepte ou lizye? Mon frer Jairo i dan en sityasyon koumsa. Toudmenm, i kontan viv en lavi ki annan en vre sans. Avan mon eksplik akoz i ti vwar ki i annan en rezon pour viv, mon pou rakont zot son zistwar.

Jairo ti ne avek en kalite *cerebral palsy* ki apel *spastic quadriplegia*.<sup>\*</sup> Anfet, i pa ti kapab kontrol lapli par son bann parti lekor. Son laservel pa ti kapab donn bann sinyal dan son bann misk alor sa ti fer son lebra ek lazannm bouz tousel. Parfwa, son bann mouvman san ekspekte i fer li fer dimal son lekor. Bann dimoun ki o bor li ti kapab ganny dimal si zot pa fer byen atansyon. Malerezman, nou ti bezwen anmar son lebra ek lipye avek son wilyer pour evite ki sa i arive.

## BANN SOUFRANS POUR VIN ADILT

Jairo ti ganny bokou douler fizik an grandisan. Kan i ti annan trwa mwan, i ti konmans ganny bebelouka e sa ti fer li perdi konnesans. Souvandfwa, manmi ti bezwen tyonbo li for e depese pour al lopital, an krwayan ki i'n mor.

Lefet ki son bann misk ti souvan anmase, avek letan son bann lezo ti vin diform. A laz 16 an, i ti deranz son laans e i ti bezwen fer en gran loperasyon kot son lazannm ek bann lezo o bor laans.

<sup>\*</sup> *Cerebral palsy* (CP) i en lekspresyon ki ganny servi pour montre ki parti laservel ki kontrol bann mouvman in ganny andomaze. I osi kapab donn bebelouka, problemn pour manze e koze. *Spastic quadriplegia* i sa kalite CP ki pli grav, tou le de lebra ek lazannm i kapab vin red e likou pa kapab tenir lo li menm.

Mon ankor rapel Jairo pe kriye tou le swar akoz douler apre son loperasyon.

Dezabilite Jairo ti fer li depan antyerman lo lezot pour manze, sanze e mont lo lili. Normalman, manmi ek dadi ki ti fer tousala pour li. Menm si Jairo ti bezwen led konstaman, nou paran ti toultan rapel li ki son lavi pa depan zis lo dimoun me osi lo Bondye.

## EN FASON POUR KOMINIKÉ

Nou paran i Temwen Zeova e zot in toultan lir bann zistwar Labib avek Jairo depi ki i ti ankor en pti baba. Zot ti toultan konnen ki lavi i annan plis sans ler en dimoun i annan en relasyon pros avek Bondye. Jairo ti'n pri dan en lekor frazil ki ti kontinyelman bouz bouze, me i ti annan en lespwar merveye pour lavenir. Par kont, zot ti toultan demann zot lekor si Jairo pou kapab konpran konnesans ki dan Labib.

En zour ler Jairo ti ankor zanfan, dadi ti demann li, "Jairo ou kapab koz avek mwan?" Apre sa i ti azoute, "Si ou vremen kontan mwan, ou pou koze!" Anmezir ki dadi ti pe sipliy li pour dir omwen en mo, larm ti marse dan lizye Jairo. Menm si i ti pe esey eksprim son santiman atraver

bann parol, i ti zis kapab gronnyen. Papa ti santi li mal lefet ki i ti'n fer Jairo plere. Me reaksyon Jairo ti montre ki i ti konpran sa ki papa ti'n dir. Problenm se ki i pa ti kapab koze.

Pa tro lontan apre, nou paran ti remarke ki par-fwa Jairo ti bouz son lizye vitman. I ti paret ki i ti pe esey fer sa pour eksprim son bann panse ek santiman. Jairo ti fristre akoz pa toultan ki lezot ti kapab konpran sa ki i ti oule dir. Me ler nou paran ti aprann pour konpran son bann siny ki i ti fer avek son lizye e donn li sa ki i ti bezwen, Jairo ti fer en gran sourir. Sa ti son fason pour dir mersi.

En *speech therapist* ti dir nou ki en bon fason pour kominik avek Jairo se lev nou de lanmen anler kan pe demann li en kestyon wi ou non. Lanmen drwat i vedir wi e lanmen gos i vedir non. Alor, i ti kapab dir sa ki i oule par fikse son lizye lo sa bon kote lanmen.

#### EN MOMAN ENPORTAN DAN LAVI JAIRO

Trwa fwa par an, Temwen Zeova i fer bann lasanble kot bann diskour baze lo Labib i ganny prezante avek bann gran lodyans. Jairo ti toultan eksite ler bann diskour pour kandida batenm ti ganny prezante. En zour ler i ti annan 16 an, papa ti de-

mann li, "Jairo eski ou anvi batize?" Deswit i ti get lanmen drwat dadi pour montre son dezir pour pran batenm. Apre sa dadi ti azoute, "Eski ou'n promet Bondye dan lapriyer ki ou pou servi li pour touzour?" Ankor enn fwa, Jairo ti deswit get lanmen drwat dadi. I ti kler ki Jairo ti'n fini dedye son lavi avek Zeova.

Apre plizyer diskisyon lo Labib, i ti kler ki Jairo ti'n byen konpran ki batenm Kreyen i vedir. Alor, an 2004 i ti reponn sa kestyon pli enportan ki i pa ti zanmen ganny demande avan, "Eski ou'n dedye ou lavi avek Bondye pour fer son lavolonte?" Jairo ti reponn sa kestyon par lev son lizye anler. I ti son fason ki i ti'n plàn pour dir wi. Alor a laz 17 an, i ti batize konman en Temwen Zeova.

#### SON LIZYE TI KONSANTRE LO FER BANN KEKSOZ BONDYE

An 2011, Jairo ti ganny en nouvo fason pour kominike. I ti ganny en konpiter ki i ti kapab kontrol avek son lizye. Sa lekipman ti swiv mouvman son lizye pour ki i kapab ouver bann laplikasyon lo konpiter. Bat lizye oubyen get en laplikasyon i parey ler en dimoun i klik en program lo konpiter par servi en *mouse*. En bord ki annan bann senbol

#### Ki bann dimoun ki konn Jairo i dir

**Rosa**, ki annan 63 an i remarke: "Ou kapab vwar lo figir Jairo ki i vreman zwaye. Son gran dezir pour servi Zeova i motiv lezot pour fer parey."

**Antonio**, ki annan 32 an i dir: "I tous mwan sak fwa mon vwar Jairo eksprim son lafwa."

**Andrés**, ki annan 67 an i dir: "I paret ki Jairo i pli byen konpran serten lansennyman dan Labib ki mwan."



Jairo i servi son konpiter ki i kontrol avek son lizye ek sa lawwa elektronik pour fer son bann komanter dan bann renyon e partaz son krwayans avek lezot

ki koresponn avek bann mo oubyen fraz ti ganny fer pour ed Jairo kominike. Ler i bat son lizye lo enn sa bann senbol, sa program i sanz en mesaz an ekri dan laform en lavwa elektronik.

Anmezir ki konprenezon Jairo lo Labib ti ogmante, son dezir pour ed lezot spirityelman ti osi ogmante. Pandan nou bann Ladorasyon Fanmir tou le semenn, souvan son lizye ti ale vini ant mwan ek son konpiter. Sa ti son fason pour fer mwan rapel pour ekri son bann komanter ki i kapab donner pandan bann diskisyon ki annan kes-tyon ek larepons dan nou bann renyon Kreyen.

Pandan bann renyon, i dousman dousman get lo konpiter pour klik lo sa laplikasyon apropiye e apre sa, tou dimoun i kapab tann sa lavwa elektronik. I fer en gran sourir sak fwa i pe ankouraz bann dimoun dan kongregasyon. Alex, enn parmi bann zenn ki zanmi avek Jairo i fer sa remark, "Mon toultan enpresyonnen sak fwa mon tann komanter Jairo konsernan en pwen dan Labib."

Jairo i osi servi son lizye pour partaz son krw-ans avek lezot. En fason i fer sa, se par klik lo en senbol ki montre en zarden kot bann zannimo ek bann dimoun tou sort ras pe viv anpe ansanm. Ler i klik lo la, sa lavwa elektronik i dir, "Dan Revela-

syon 21:4, Labib i donn en lespwar kot later pou vin en paradi e maladi ek lanmor pou nepli egziste." Si sa dimoun i demontre lentere, Jairo i klik lo en lot senbol ki dir, "Eski ou ti a kontan etidye Labib avek mwan?" Nou ti sirprann kan nou granpapa ti aksepte sa lenvitasyon pour etidye Labib. I ti eksitan pour vwar Jairo pe fer letid granpapa dousman dousman akonpannyen par en lot Temwen Zeova. I ti en lazwa, ler granpapa ti batize pandan lasanble rezyonal trwa zour Madrid, Out 2014.

Bann ansenyan kot son lekol ti remark devosyon Jairo anver Bondye. Rosario, enn son bann *speech therapist*, ti dir: "Si en zour mon anvi antre dan en larelizyon, mon pou vin en Temwen Zeova. Mon'n vwar ki mannyer lafwa Jairo in donn li en vre bi dan lavi, malgre son sityasyon difisil."

Lizye Jairo i toultan ouver gran ler mon lir avek li sa promes dan Labib: "Sa enn ki bwete pou grenpe parey en serf e lalang sa enn ki kozpa pou kriye avek lazwa." (Izai 35:6) Menm si parfwa i santi li dekouraze, i souvan annan en bon leta lespri. Sa i selman posib akoz son lavi antye i santre lo Bondye ek son bann zanmi Kreyen. Son lazwa ek son lafwa for i laprev ki servi Zeova i kapab fer ki en lavi difisil i vo lapenn pour viv. ■





KI MANNYER LANMOR ZEZI I FER LI POSIB  
POUR ANNAN EN LASOSYETE KOT DIMOUN  
I PRAN SWEN AVEK KANMARAD?



Pour plis  
lenformasyon  
vwar sapit 5  
dan sa liv  
pibliye par  
Temwen Zeova

I osi disponib  
lo [www.jw.org](http://www.jw.org)

Silvouple anvoy en kopi sa liv  
*Ki Labib i vreman dir?* pour mwan

LANGAZ \_\_\_\_\_

NON \_\_\_\_\_

LADRES \_\_\_\_\_

\_\_\_\_\_

\_\_\_\_\_

Pour ladres vwar paz 2

## Ki lavenir i rezerve pour imen?

Byensir imen pou kontinyen fer progre dan domenn la-  
syans. Me eski zot tousel zot pou reisi etabli en laso-  
syete kot dimoun i senserman enterese pour pran swen  
avek kanmarad? Non. Ozordi, sa lemonn i ganny kontro-  
le par legoizm ek vorasite. Par kont, Bondye in plàn en  
pli meyer lavenir pour lafanmir imen.—**Lir 2 Pyer 3:13.**

Parol Bondye i dekrir en lavenir kot dimoun dan le-  
monn antye pou kontan kanmarad. Dimoun pou viv an  
sekirite e pou napa personn ki pou fer zot diton.  
—**Lir Mika 4:3, 4.**

## Ki mannyer legoizm pou ganny eliminen?

O konmansman Bondye ti kree imen san okenn tan-  
dans egois. Me par swazir pour dezobei Bondye, sa pre-  
mye imen ti perdi perfeksyon. Nou'n erit sa tandans  
pour vin egois avek sa premye imen. Malgre sa, atraver  
Zezi, Bondye pou redonn bann imen sa perfeksyon.  
—**Lir Romen 7: 21, 24, 25.**

Annakor avek lavolonte Bondye, Zezi ti mor konman  
en sakrifis e i ti efas lefe dezobeisans sa premye imen.  
(Romen 5:19) Alor Zezi ti ouver semen pour en lavenir  
merveye kot dimoun pou nepli annan sa tandans egois  
pour fer sa ki mal.—**Lir Psonm 37:9-11.**

LIR LAREPONS LEZOT  
KESTYON LO INTERNET



Download  
gratwitman sa  
magazin oubyen  
bann kopi presedan



Labib i disponib lo  
nou sit Enترنت dan  
anvion 100 langaz

Al lo [www.jw.org](http://www.jw.org),  
ouswa skàn sa kod

